

Verabschiedung Parlament

Liebi Kollege u Kolleginne

I nutze d'Zyt, wo ds Resultat vor Wau ermittelt wird, um euch no es paar Idrück us mim Jahr witerzgäh.

Wenn i zugg luege dünkts mi ungloublich wi schnäu das Jahr vorbi gange isch, es einmaligs, spannends, unvergässlichs aber o herusfordernds u mängisch o ermüedens Jahr.

I gloub aui wo so nes Amt anäh hei Vorsätz, was si wetti ändere, anders mache u villicht wo si Spure wette hingerlah.

Hüt bini dr Meinig, dass wenn me ds Präsidium guet wott mache, das gar nid cha glinge, ömu nid so, dass si mit emne grosse Echo wahr gno wärde . Aus Presidäntin lat me sech für nes Jahr la neutralisiere. D.h. unparteiisch si, unabhängig, diskret usw. Je besser der ganz Ratsbetrieb louft, umso weniger wird ds Präsidium wahrgno, wüu sech de aui uf ds Wäsentliche, uf e Inhalt vo de Gschäft chöi konzentriere – das beinhaltet villicht e gwüssi Ironie, isch aber e Tatsach woni richtig u guet finge u e Erkenntnis, was villicht gar nid so schlächt wär, wenn si sech o i angere Gebiet würd düre setze – sech weniger de Persone u meh der Sach widme.

Ds Präsidiaujahr het gloub vorauem bi mir Spure hingerlah, im Sinn vo: Je meh Iblick dass i ha übercho, umso meh isch mer bewusst worde, wi weni dass i weiss!

Wenn me di höchi Kunscht vor Problemlösig wüchlich wott praktiziere – u das wei mer aus animaux-politic sicher aui da inne – de sötte mer ja aui Faktoren kenne, damit mer mit der Lösig nit grad glichzeitig nöii schaffe.

Jetzt höre ni aber uf mit philosophiere, dir heits ja sicher das Jahr gnue gmerkt, dass mer das sehr nach ligt... Das darf o si für nes Jahr u de isches äbe de guet, wenn wider öpper nöis da vorne hocket u es anders Lüftli bringt. I freue mi uf e nöi Wind vor zuekünftige Presidäntin Chantal Borno Flück, bestimmt wird si üs mit ihrem Charm u Witz mängs Schmunzle abringe. Angersits bi ni o gspannt, wi sech d'Sitzigsleitig uf französisch uswürkt, villicht müesst der de sogar chli konzentrierter zuelose, wüus süsch chönnt passiere, dass z.B. fautsch abgstumme wird – ganz ehrlich, das tuet nech guet u nach däm Jahr si mer de villicht sogar chli stouz, wi guet dass mer jetz französisch verstöh – mir chömme auso so d'säge zum ne Gratis-Franzkurs!

Liebi Kolleginne u Kollege i danke euch ganz hätzlich für ds grosse Wohlwolle woni vo euch ha gspürt.

Danke tuen'i o dr Bou- Verkehrs- und Energiediräktorin Barbara Egger, wo im Jahr aus Regierigspresidäntin vii zuesätzlechi Verpflichtige het übernoh u ne mit Freud u Kompetenz nahe cho isch.

De chani nid meh aus es risigs Dankeschön a aui Mitarbeitende vor Staatskanzlei richte, di grossi Ungerstützig, Hiufsbereitschaft u ds'zur Verfüegigsteue vo auem Fachwüsse mit dere ungloubliche Säubstverständlichkeit u Fründlichkeit isch einmalig!

Merci vii mau euch aune u i freue mi uf di witeri Zämearbeit – de wider aus entneutralisierti Grossrätin.